

Inunnik annertusisamik innarluutilinnut ikiorsiisarneq pillugu FN-ip innarluutillit pisinnaatitaaffii pillugit isumaqatigiissutaanut naapertuunnerusumik Naalakkersuisut iluarsaatamik inatsisilioqqullugit Inatsisartut aalajangiiffigisassaattut siunnersuut, taamaalilluni pisinnaatitaaffiit teknikkigit inatsisinut attuumassutilinnut atuuttussanngorlugit aaqquissuunneqarlutik, allannguut kingusinnerpaamik UPA2017-imi saqqummiunneqassaaq.

(Inatsisartunut ilaasortat, Siumut)

Naalagaaffiit Peqatigiit inuit innarluutillit pillugit Isumaqatigiissutaanni pisinnaatitaaffiit siuarsarneqarnissaannut Naalakkersuisut peqquneqarnissaannik Inatsisartuni aalajangiiffigisassatut siunnersuut, tamatumani inatsimmi pineqartunut atuuttumut atuutsinneqalernissaat aammalu suliat ingerlanneqarnerini Naalagaaffiit Peqatigiit inuiat innarluutillit pillugit Isumaqatigiissutaanni Kalaallit Nunaanni atuuttut suliarineqarnerini iliuusissatut pilersaarutinut ilanngullugit suliarineqarnissaat.

(Inatsisartuni eqimattat, Inuit Ataqtigiit)

Akissut

(Ilaqutariinnermut, Naligiissitaanermut Isumaginninnermullu Naalakkersuisuni ilaasortaq)
Siullermeerneqarnera

Naalakkersuisut aalajangiiffigisassatut siunnersuummut qujapput.

Inuit innarluutillit pisinnaatitaaffii pillugit Naalagaaffiit Peqatigiit isumaqatigiissutaat Naalagaaffiit Peqatigiinni ulloq 13. december 2006-imi akuerineqarpoq. Inuit innarluutillit tunngaviusumik inuttut pisinnaatitaaffii isumaqatigiissutip qulakkiissavaa. Juli 2009-mi Danmarkip isumaqatigiissut atortussanngortippaa, Inatsisartullu isumaqatigiissummut ilanngupput UKA2012-imi.

Innarluutilinnut suliasaqarfiit inuillu innarluutillit pisinnaatitaaffiisa pitsanngorsarnissaat Naalakkersuisut eqqummaariffigaat. Naalakkersuisooqatigiinnissamik isumaqatigiissummi erserpoq, innarluutillit pillugit nutaamik inatsisiliornermi inuit innarluutillit pisinnaatitaaffii qitiussasut, inuit innarluutillit isumassorneqarnerannut sullinneqarnerannullu pissutsit pitsanngorsarniarlugit Naalakkersuisut sulissasut suliasaqarfiullu iluani suliniutinik assigiinngitsunik aallartitsisoqareernikuusoq.

Inatsisartut 2017-imi ukiaanerani ataatsimiinnissaannut saqqummiunneqartussanngorlugu, innarluutillit pillugit nutaamik inatsisiliorniarlutik Naalakkersuisut piareersarlutik aallartinnikuupput. Innarluutilinnut suliasaqarfiup 2011-imi kommuninut nuunneqarneranut atatillugu Naalakkersuisut misilittakkatik tunuliaqutaralugit inatsisissaq suliarissavaat. Aammattaaq innarluutillit pillugit isumaqatigiissut pillugu Danmarkip nalunaarussiaa siullegg tunuliaqutaralugu Naalagaaffiit Peqatigiit inuit innarluutillit pillugit ataatsimiititaliaata innersuussutai nutaamik inatsisiliornissamut piareersarnermi ilanngunneqarumaarput.

Inuit innarluutillit pillugit inatsisissami isumaqatigiissut sapinngisaaq tamaat ilanngunneqassasooq Naalakkersuisut isumaqatigilluinnarpaat.

Inuit innarluutillit pisinnaatitaaffii isumaginninnermut inatsimmiinnaq qulakkeerneqassanngitsut erseqqissaatigissallugu Naalakkersuisunit pingaartinneqarpoq. Inuit innarluutillit pisinnaatitaaffii Kalaallit Nunaanni nalinginnaasumik inatsisiliornermi qulakkeerneqarnissaat pisariaqarpoq, assersuutigalugu peqqinnissaqarfiup, ilinniarfeqarfiup suliffeqarnerup il.il. iluinni.

Taamatut oqaaseqarluta aalajangiiffigisassatut siunnersuutit marluk akuerineqarnissaat naalakkersuisut inassutigaat